


TEZĂUR LITURGIC
16 IUNIE

ACATISTUL
SF. CUVIOS
TIHON
DE LA LUHOV



MOSCOVA, 2000



Акафист

святому преподобному Тихону, Лужскому чудотворцу

Кондак 1

Избранный и дивный угодниче Христов, преподобне отче Тихоне! По достоянию ублажити тя недоумеем мы, любовью чтущии тя; обаче тоюжде любовью побуждаеми, похвальная восписовати тебе дерзаем. Ты же, просвещаяся ныне обильно от Божественного света во Царствии Христа Бога, и нас омраченных греховными страстьми просвети, и твоими ко Господу молитвами от всяких бед избави, да радуящися вопием ти: Радуйся, Тихоне преподобне, преславный чудотворче.

Икос 1

Ангельстии чини возрадовашася твоим подвигом, имиже в пустыни сей подвизался еси, в посте и бдении просияв и в молитвах непрестанных, серафимскою горя любовью к Богу. Темже мы ныне почитающе тя, яко

приснаго собеседника ангелов, со усердием похвальная пения восписуем ти сице:

Радуйся, во плоти небесный жителю;

Радуйся, страстей телесных победителю.

Радуйся, воздержания образ явивый;

Радуйся, пустыню Луховскую просветивый.

Радуйся, иноком на спасение учителю;

Радуйся, безмолвия добрый рачителю.

Радуйся, истинный в добродетелех наставниче;

Радуйся, скорый в скорбех помощниче.

Радуйся, на путь правый заблуждающих наставляяй;

Радуйся, неослабнаго терпения образ нам являяй.

Радуйся, унывающих утешение;

Радуйся, согрешающих исправление.

Радуйся, Тихоне преподобне, преславный чудотворче.

Кондак 2

Видяще окрестнии жители безмолвное житие твое, преподобне отче наш Тихоне, дивляхуся твоему терпению; темже и мы, духовная чада твоя, любезно ныне воспоминающе подвиги и труды твоя, прославляем тебе прославившаго Бога, дивнаго во святых Своих, и поем Ему: Аллилуиа.

Икос 2

Разуму податися нам Божественному, помолися к Сильному и Богу разумов, преподобне отче Тихоне, во еже разумно ублажати тя; ты бо Божественным сияя светом, со ангелы водворяеши ныне, и приими посильное ублажение сие от нас, радостно похвалы сицевая тебе приносящих:

Радуйся, постническими добродетельми просиявый;

Радуйся, Божественную благодать стяжавый.

Радуйся, чистоты усердный хранителю;

Радуйся, безмолвия истинный любителю.

Радуйся, ангелов собеседниче;

Радуйся, ко Христу Богу о нас грешных
молитвенниче.

Радуйся, Троичнаго света присный зрителю;

Радуйся, темныя области слуг прогонителю.

Радуйся, подвигов иноческих наставниче;

Радуйся, небесныя славы наследниче.

Радуйся, яко печали от человек отгоняеши;

Радуйся, яко скорую помощь всем
подаваеши.

Радуйся, Тихоне преподобне, преславный
чудотворче.

Кондак 3

Сила Вышняго благодатне осени тя,
преподобне отче Тихоне, и показа тя всем яве
селение и жилище быти Святаго Духа. Темже и
мы, любовию почитающе память твою, верно
вопием Богу, дивному во святых Своих:
Аллилуиа.

Икос 3

Имуще тя велика, отче, заступника и скорого
в бедах и напастех помощника, мы, духовная

чада твоя, святую память твою совершающе,
сия тебе любовью восписуем:

Радуйся, скорбящим Божественное утешение;

Радуйся, светлое Божия благодати селение.

Радуйся, ревностный Троицы Святыя
служителю;

Радуйся, скорый всех унывающих
посетителю.

Радуйся, противныя силы прогнание;

Радуйся, недугующих врачевание.

Радуйся, столпе веры, Богом Самим
утвержденный;

Радуйся, учителю благочестия совершенный.

Радуйся, ко спасению всем нам
благонадежный водителю;

Радуйся, бедствующих защитителю.

Радуйся, Бога паче всего возлюбивый;

Радуйся, богатство и славу мира сего ни во
чтоже вменивый.

Радуйся, Тихоне преподобне, преславный
чудотворче.

Кондак 4

Бурю страстей многомятежнаго мира сего возненавидев, преподобне отче Тихоне, устранился еси сует его и водворился еси в пустыни, чая Бога, спасающаго тя от малодушия и от бури. Ныне же в вышних обителях водворяяся, Владыце всех с небесными силами предстоиши, поя купно с ними спасшему тя Богу: Аллилуиа.

Икос 4

Светозарную лучу имуще тя вернии, молим тя, преподобне отче наш Тихоне, просвети и вразуми сердца наша во спасение, да радующесея вопием тебе сице:

Радуйся, пределов Костромских украшение;

Радуйся, Луховския пустыни озарение.

Радуйся, постников красото;

Радуйся, подвижников доброто.

Радуйся, благодатию Духа Святаго осиянный;

Радуйся, источниче чудес богодарованный.

Радуйся, исцелений независтный подателю;

Радуйся, немудрых богомудрый наказателю.

Радуйся, в болезнях сущих добрый врачу и целителю;

Радуйся, всех призывающих тя с верою скорый посетителю.

Радуйся, чудесы твоими Луховскую страну просвещающий;

Радуйся, исправлении твоими славу Божию возвещающий.

Радуйся, Тихоне преподобне, преславный чудо-творче.

Кондак 5

Светильника тя показа светла, иже чудес Бог и Отец светов, горяща и светяща в сей уединенной пустыни, преподобне отче наш Тихоне. Темже окрестнии людие, дивящесе твоему благочестию и святыни, воспеваху дивному во святых Своих Богу песнь: Аллилуиа.

Икос 5

Видяще святое твое житие людие Луховстии, Тихоне преподобне, начаша благоговейно тебе почитати: ты же, бегая славы человеческия, тай работал еси Богу, прославльшему тя яве славою нетления и благоуханием святыни. Темже и мы,

духовная чада твоя, сицевая любовь вопием ти:

Радуйся, яко светило в пустыни сей сияющий;

Радуйся, чудеса твоими всех просвещающий.

Радуйся, наставниче великий на путь спасения;

Радуйся, истинный последователю Евангельскаго Христова учения.

Радуйся, иго Христова благое на себе восприявый;

Радуйся, всего себе и весь живот твой Христу Богу предавый.

Радуйся, нестяжания образ нам явивый;

Радуйся, вольную нищету возлюбивый.

Радуйся, забывшаго обет свой человека отечески наказавый;

Радуйся, томужде вскоре исцеление и здравие телесное чудесно даровавый.

Радуйся, терпением скорбей всяческих в пустыни сей просиявый;

Радуйся, вольною нищетою вечное богатство стяжавый.

Радуйся, Тихоне преподобне, преславный чудотворче.

Кондак 6

Гласа, вопиющаго в пустыни: "Уготовайте путь Господень", и проповеди Евангельския, еже не пещися ни о чесом же, послушавый от сердца, вся сущая в мире Бога ради презрел и оставил еси, да Христа единого приобрящеши, Тихоне преподобне. Темже и нам от Христа Бога получитьи ослабу от страстей умоли, вопиющим Ему: Аллилуиа.

Икос 6

Возсиял еси от Литовския земли, яко светозарная звезда от темнаго запада, преподобне отче Тихоне, и просветил еси пустыню Луховскую сиянием твоих доблестей. Темже молим тя усердно, от всяких вражеских наветов данною тебе от Бога благодатию избавити нас, вопиющих тебе сицевая:

Радуйся, крест твой терпеливно носивый;

Радуйся, плоть свою духови покоривый.

Радуйся, усердный винограда Христова делателю;

Радуйся, пустыни тщаливый устроителю.

Радуйся, ублажаемый на земли;

Радуйся, прославляемый на небеси.

Радуйся, от страстей и бед чтущия тя
избавляющий;

Радуйся, молящихся тебе от уз греховных
разрешающий.

Радуйся, яко мзда твоя на небеси многа;

Радуйся, яко восприял еси сугубо воздаяние
трудов твоих от Бога.

Радуйся, вышняго Сиона гражданине;

Радуйся, моляйся тамо о нас, молитвенно
вспоминающих тя ныне.

Радуйся, Тихоне преподобне, преславный
чудотворче.

Кондак 7

Удивися Суждальский епископ Симеон твоей
нищете глубоцей и совершенному нестяжанию,
преподобне отче Тихоне, еже наипаче по
преставлении твоём всем яве показал еси; темже
от своих си усердно послужи твоему
погребению, зовый Богу песнь: Аллилуиа.

Икос 7

Новый воистинну подвижник показался еси и стране сей, Тихоне преподобне, с преподобным Макарием подвизався, с нимже купно и упокоеваешия в вечных обителях. Мы же почитающе твоя подвиги и труды, похвальными песнопении сице память твою ублажаем:

Радуйся, постом и бдением и молитвою страсти греховныя разуму покоривый;

Радуйся, оружием креста князя тьмы победивый.

Радуйся, яко всякое желание плотское увядил еси;

Радуйся, яко безстрастием природу победил еси.

Радуйся, иноческих подвигов ревнителю;

Радуйся, пустыни Луховския благоукрашителю.

Радуйся, постников похвало и славо;

Радуйся, воздержания подвижников зеркало.

Радуйся, всякую добродетель в себе изобразивый;

Радуйся, иго Христово и бремя Его легкое
возлюбивый.

Радуйся, истинную веру собою
утверждающий;

Радуйся, в невечернем дни Царствия
Христово пребывающий.

Радуйся, Тихоне преподобне, преславный
чудотворче.

Кондак 8

Странное и жестокое житие твое бысть в
мире сем, Тихоне преподобне; ты бо и землю
пустынную орати руками своима не
возгнушался еси, и в древоделии упражняся,
неблагообразныя виды лепотным благообразием
украшал еси, и телесную болезнь терпением
побеждая, непрестанною молитвою воспевал еси
выну, яко безплотен, песнь Богови: Аллилуиа.

Икос 8

Весь был еси умом и сердцем твоим в
вышних, аще и в земледелии упражнялся еси,
преподобне Тихоне, и горе оком души твоея
присно взирал еси. Темже и ныне всецело
водворяся тамо, заступаеши всех, верою и
любовию вопиющих тебе таковая:

Радуйся, новый пустынножителю;

Радуйся, древних подвижник усердный ревнителю.

Радуйся, Сергию Великому подражавый;

Радуйся, в пустыни Луховстей чудесы просиявый.

Радуйся, духовного совершенства учителю;

Радуйся, добродетелей христианских рачителю.

Радуйся, всяцем образом Владыце всех угодивый;

Радуйся, равноангельное житие во плоти на земли поживый.

Радуйся, яко молитвы Богу присно о нас приносиши;

Радуйся, яко всем полезная от Бога просиши.

Радуйся, яко Христа в души твоей сообразил еси;

Радуйся, яко равную с первыми делатели, аще и последний леты, мзду от Него получил еси.

Радуйся, Тихоне преподобне, преславный чудотворче.

Кондак 9

Луховская страна удивися тебе, Тихоне преподобне, во дни подвигов и трудов твоих; но и доньне по достоянию ублажает честную память твою. Ты бо мира сего красная ни во чтоже вменив и Единого Бога всем сердцем своим возлюбив, явился еси воистинну глас вопиющаго в пустыни, и яко безплотен во плоти пожив, воспевал еси непрестанно, и ныне со ангелы поеши присно Богу песнь: Аллилуиа.

Икос 9

Витии хитрословесныя по достоянию восхвалити тя не могут, богомудре отче наш Тихоне: ты бо от юности весь Богу прилепился еси, и даже до конца многотруднаго жития твоего Тому усердно послужил еси. Мы же любовью вопием тебе сице, по силе нашей тя ублажающе:

Радуйся, православия ревнителю;

Радуйся, благочестия рачителю.

Радуйся, напастей тьму отгоняй;

Радуйся, на путь спасения наставляяй.

Радуйся, яко нас, чад твоих, духовно
посещаеши;

Радуйся, яко многая благодеяния всем
подаваеши.

Радуйся, яко молитвы о нас Богу приносиши;

Радуйся, яко о всех злостраждущих Господа
просиши.

Радуйся, унывающих утешение;

Радуйся, согрешающих исправление.

Радуйся, пустынножителей российских
удобрение;

Радуйся, костромских пределов славо и
похваление.

Радуйся, Тихоне преподобне, преславный
чудотворче.

Кондак 10

Спасти хотя душу твою, преподобне отче наш
Тихоне, инославнаго отступнического суемудрия
благоразумно отбегл еси, и областей великия
России достиг, в пустыни Луховския страны
православную веру невредимомо соблюл еси, еюже
к вечному Востоку востек, со ангелы поеши
присно песнь Богови: Аллилуиа.

Икос 10

Стену ты незыблему и град убежища
необоримый во всех скорбех и напастех
житейских стяжавше, преподобне отче наш
Тихоне, тебе, яко присному к Богу о нас
молитвеннику, похвальная приносим пения
сице:

Радуйся, сущих в бедах и треволнениях
всегда готовый посетителю;

Радуйся, Божественных велений ревностный
исполнителю.

Радуйся, яко молитвою и постом врагов
шатания низложил еси;

Радуйся, яко пути Господни правыя тщаливо
со-хранил еси.

Радуйся, страсти плотския воздержанием
умертвивый;

Радуйся, во плоти, яко безплотен, на земли
сей поживый.

Радуйся, многосуетнаго мира любве ради
Христовы отрекийся;

Радуйся, в пустыни, яко в тихом пристанище,
в нова человека, созданного по Богу, в правде и
святости истины облекийся.

Радуйся, яко незрелся еси вспять, возложь
руку твою на рало;

Радуйся, граду нашему Луху и всей стране его
стена и забрало.

Радуйся, веры светлый светильниче;

Радуйся, ко грядущему граду верный
наставниче.

Радуйся, Тихоне преподобне, преславный
чудотворче.

Кондак 11

Пение всех Богови непрестанное во всем
житии твоём приносил еси, преподобне отче
наш Тихоне. Ныне же от нас воспеваемый и по
достоянию ублажаемый на земли, тамо на
небеси купно со ангелы прославльшему тя дивно
Богу воспеваеши вечное: Аллилуиа.

Икос 11

Светозарный светильниче благодати и
великий угодниче Божий, Тихоне преблаженне.
Ты многими и великими добродетельми сияюшь,

яко светило умнаго неба, вшел еси в небесныя обители и предстал еси Престолу Царя Славы, идеже ныне и нас поминай, вопиющих тебе сицевая:

Радуйся, яко закон Христов не словом или языком, но самым делом истинно исполнил еси;

Радуйся, яко всецело посвятился Богу, совершенно ему благоугодил еси.

Радуйся, за сие восприятый от Него в горняя селения;

Радуйся, сподобивыйся тамо с верными Его рабами вечнаго веселия.

Радуйся, в истинней вере нас утверждающий;

Радуйся, от напастей и бед свободяющий.

Радуйся, яко безплотным подобно пожил еси;

Радуйся, яко ангельских ликостояний сподобился еси.

Радуйся, Божия благодати нам ходатаю;

Радуйся, Божиих дарований всем подателю.

Радуйся, яко врагов спасения нашего посрамляеши;

Радуйся, яко вся козни и наветы их разрушаеши.

Радуйся, Тихоне преподобне, преславный чудотворче.

Кондак 12

Благодать, данную тебе свыше от Отца светов, преподобне отче наш Тихоне, и вся труды твоя и подвиги кто от человек изреци и похвалити возможет по достоянию; в пустыни бо нестяжательно и трудолюбно пожив, стяжал еси смирением твоим высокая и нищетою твоею богатая, и вселился еси со ангелы и всеми святыми в горнем Иерусалиме, поя присно Богу песнь: Аллилуиа.

Икос 12

Поем добльственныя твоя подвиги, ублажаем святое житие твое, почитаем честную и достохвальную кончину твою и прославляем священную память твою, преподобне отче наш Тихоне! И от избытка сердца похвальная вопием ти сице:

Радуйся, от ангел с торжеством в радость Господа твоего введенный;

Радуйся, в чертозе небеснем лику святых
сопричтенный.

Радуйся, православных крепкий поборниче;

Радуйся, христианом скорый помощниче.

Радуйся, истинныя веры, терпения и
смиреномудрия добрый блюстителю;

Радуйся, суеверия и всякия злобы и вражды
искоренителю.

Радуйся, пустынное стадо твое духовно
посещай;

Радуйся, нам, духовным чадом твоим, мир и
благословение свыше невидимо подаваяй.

Радуйся, делателю добрый;

Радуйся, пастырю бодрый.

Радуйся, избранный сосуд благостыни;

Радуйся, прославленный от Господа
благоуханием святыни.

Радуйся, Тихоне преподобне, преславный
чудотворче.

Кондак 13

О всехвальный угодниче Христов и
чудотворче предивный, преподобне и блаженне

отче Тихоне! Молим тя верою и любовью, и вопием тебе всеусердно: приими ныне малое моление сие наше и умоли милостиваго Бога, да избавит нас от всяких бед и напастей молитвами твоими, и будущия свободит муки вопиющих Ему: Аллилуиа.

(Этот кондак читается трижды, затем икос 1 и кондак 1)

Молитва

О священная главо, преподобне и достоблаженне отче наш Тихоне! Ты воистинну муж желаний духовных и вторый Даниил показался еси. Якоже бо оный древний высокою добродетелию и святостию жития своего небесных видений и дивных откровений сподобился; сице и ты, преподобне, восхождения в сердца своем полагая, преспевал еси в добродетелех, восходя от силы в силу, и яко добрый и верный раб, вшел еси в радость Господа твоего. Темже и мы, яко духовная чада твоя, любовью побуждаеми, похвальная песнопения в честней памяти твоей, по мере веры нашея, тебе восписуем и молитвенно на помощь нашей немощи призываем. Смиренно молим тя, преподобне и преславне отче наш

Тихоне, твоими благоприятными ко Господу молитвами заступи возлюбленную тобою пустыню сию, град же и весь, и всех вероучущих святую память твою, от всякаго навета сопротивнаго, от всяких бед и напастей и от всякаго зла. Молися, преподобне, о всей державе нашей. Умоли милостиваго Бога и о нас смиренных и недостойных, да отпустит нам вся прегрешения наша, да спасет нас благодатию Своею, и сподобит радости вечныя наслаждаться в горнем онем Иерусалиме, иже есть мати всем нам, купно с тобою и со всеми святыми, от века Ему благоугодившими, в нихже в Троице славимый Бог благословен есть всегда, ныне и присно, и во веки веков. Аминь.

